

Entrevista exclusivo...

EXCELENTE MUSICO ARUBANO RENO STEBA A GRADUA COMO MAESTRO DI MUSICA NA HULANDA



**** Reno Steba bishitando su queridisima abuelamama Susanita Roga-Pourier den Hospital. DEN AMBIENTE ta desea Susanita un pronto recuperacion...**

** Recientemente tabata na Aruba e gran musico Reno Steba, kende pa varios aña ta residencia na Hulanda. Reno Steba tabata na Aruba especialmente pa bishita su queridisima abuela/mama Susanita Roga-Pourier, kende ta sufriendo un quebrante di salud den Dr. Horacio Oduber Hospital.

Probechando di e bishita di e gran musico Arubano aki, DEN AMBIENTE a realiza un entrevista exclusivo cu Reno Steba, kende no ta un musico desconoci aki na Aruba.

Reno ta jiu di e gran trom-

petista/areglista Oscar Steba, kende tambe pa varios aña ta residencia na Hulanda. Tempo cu Reno Steba tabata biba na Aruba, e tabata forma parti di e inolvidable bandanan musical; Musical Time y Triple S. Tambe Reno a forma parti di e exitoso banda "Earth Sensation".

Despues Reno a haya oferta pa traha como musico di hotel, na unda practicamente den e epoca di aña '80, el a toca den tur hotel.

Reno tabata goza di un popularidad grandi na Aruba como areglista y ba-

jista. Tambe Reno tabata traha hopi den studio di grabacion como areglista, bajista y productor pa varios produccionnan local. Pa festivalnan di Voz i Landia y O.T.I, Reno a duna su maximo contribucion.

Pa su gran aporte y talento, Reno Steba a ser reconoci pa "Premio Mo Tito" na aña 1984 como Musico di Aña, y na aña 1985 como Areglista di aña.

Na aña 1985, Reno a dicidi di bay purba su suerte y alavez amplia su carera musical na madre patria Hulanda. Na Hulanda, Reno a forma parti di bandanan tanto Pop/Rock y orquestanan di Salsa y tambe gruponan Antillano, manera entro otro; Willy Latino, Tony Sherman, Unisono, The Zoo y Siembra.

Na tres ocasion Reno Steba a bishita Aruba como musico profesional, formando parti di e grupo di Jazz cual a presenta durante e Aruba Jazz & Latin Music Festival.

Na Hulanda Reno Steba ta hopi solicita pa diferente gruponan di Jazz, muy especial esnan brasileño y tambe gruponan Latino.

Como areglista Reno a produci varios produccionnan di CD, cualnan a alcanza como hitnan grandi riba

varios cartelanan Europeo y tambe na Cali, Colombia y hermana isla Curacao.

Produccionnan cu Reno a forma parti tabata; Electric Band, Studio Band, Sticks and Strings, Martin Verdonk Project, Patrick Sedoc, Veronica Medina y Siembra.

E hit di mas grandi cu Reno a yega di produci tabata esun "Carelles Whisper" di George Micheal, cual el a transforma den e ritmo di Salsa Erotica. E salsa aki tabata un exito rotundo na Cali, Colombia, den cual Reno a ricibi varios ofertanan di diferente productor nan pa re-produci e cancion riba nan label.

Como bajista formando parti di diferente gruponan, Reno Steba a comparti escenarionan cu musiconan di halto caliber, manera e.o. Alex Acuña y Armando Peraza.

Actualmente Reno ta concentra mas den e musica di Jazz, cual e ta forma parti pa e cinco gruponan; Sticks and Strings, Batida, Alvorada, Seduction y Blue Print. Puntando Reno con e por forma parti di cinco grupo di Jazz pareuw, Reno a contesta cu esaki ta masha facil y comun na Hulanda, ya cu tur concierto for di un aña adelanta ta ser programa.


Na su yegada na Hulanda, ya caba e tin cu cumpli cu varios compromisonan manera conciertonan na diferente ciudadnan na Hulanda y tambe na Belgica. Pa loke ta trata e aña aki, practicamente henter aña Reno ta ocupa cu conciertonan.

Tambe Reno a caba di gradua como maestro di musica. El a sera e curso Methodiek Dedactiek. E curso aki tabata encera con pa duna les na tur sorto di edad y tambe traha bukinan di les. Reno actualmente ta dunando les di musica na Muziek School di Amsterdam, na unda e les ta mas den musica di Pop y musica Afro-Caribense.

Reno su futuro proyectonan lo ta traha un buki di les pa Aruba, muy especialmente pa e bajistanan. Tambe Reno lo bay sigui un curso pa co-ordinador di musica, pa asina e mes por lanta su propio Muziek School.

Pa loke ta trata produccionnan, Reno a declara cu muy pronto e lo bay lansa un C.D. pa e mercado Caribense y tambe dos CD di Jazz, cualnan ya ta den preparacion pa drenta studio di grabacion.

Diahuebs ultimo e gran musico maestro a viaha pa Hulanda y a priminti di lo bay keda den contacto cu DEN AMBIENTE...



**** Aki por aprecia Padu del Caribe mandando su caluroso bon deseonan pa su gran amigo musico Oscar Steba na Hulanda, via e cassette graba pa Ebby Peterson...**



**** Tambe Reno Steba a realiza un bishita cerca nos Tata di Cultura Padu del Caribe, kende ta un gran amigo di su Tata musico Oscar Steba. Tambe por aprecia e baterista priva pa hopi aña di Padu, Ebby Peterson...**